

Niamatlahcuilol in teotlatlantli Pablo tlen oquihcuiluilih in

# Filemón

## Pablo ictlahpaloua in Filemón

<sup>1</sup>Neh Pablo intzacutoc nic intlanonotza de Cristo Jesús. Nin amatl neh uan in tocníu tlaniltocani Timoteo itmitzonihcuiluiliah touatzin, totlasohicniú Filemón naquin sansican itsepanquitih.

<sup>2</sup>Noiuqui ittlahcuiluiliah in tocnitzin tlaniltocani Apia uan Arquipo naquin touan quixnamiquih in amocuali, uan nochtin in tlaniltocanih tlen monichicouah mochantzin:

<sup>3</sup>In toTahtzin Dios uan toTecotzin Jesucristo manamechonpialican tetlasohitalistli, uan ninseuilitzin mai namouantzin.

## Nitetlasohtlalis uan nitlaniltoquilis in Filemón

<sup>4</sup>Nochípa ihcuac inmonochilia Dios uan inmitzonilnamiqui, inmotlasohcamati inauactzinco mopampa,

<sup>5</sup>pues onechiluihqueh quen simi tontlaniltoca uan itconpia tetlasohtlalis inauac in toTecotzin Jesús, uan sannoiuqui innauac nochi niacatzitzin Yehuatzin.

<sup>6</sup>Intlatlautia Dios in tlaniltoquilis tlen itsepanpiah macpia mic cuali itlatiyo motichtzin, uan ohcon macnexti nochi tlen cuali secpia ihcuac sepouí sanse iuantzin Cristo Jesús.

<sup>7</sup>Nocnitzin, tlailiuis inpaquí uan inyolsehseuí nic ica motetlasohtlaltzin yotquimonyolchicau mi-queh iacatzitzin Yehuatzin.

## Pablo ictlahtouia in Onésimo

<sup>8</sup>Ica nochi non, inmoyolchicaua mouantzin, uan masqui ica nitooacatzin Cristo neh onuilisquia inmitzontlatiquitis tlen moniqui itconchias,

<sup>9</sup>amo inchiua ohcon, yehyeh inmitzontlatlautia ica tetlasohtlalis, neh Pablo naquin ya intetahtzin uan axan intzacutoc nic intlanonotza de Cristo.

<sup>10</sup>Inmotlatlautia monauac ipampa in Onésimo, naquin omochiuaco quemeh noconeú nic ica neh otlaniltocac nican campa intzacutoc.

<sup>11</sup>Onésimo oyah se esclavo amo yec tiquitini monauac, masqui

ohcon, axan yomochiu se cuali tiqitini nonauac, uan ohcon isqui monauac.<sup>a</sup>

<sup>12</sup>In Onésimo incuipa monauac-tzinco, iuan yeh yauí moyolo.

<sup>13</sup>Neh onniquisquia mai nican nouan, uan manechmatlani mopampa nican campa intzacutoc nic intematiltia in tlahtol tlen cualica temaquixtilistli.

<sup>14</sup>Masqui ohcon, amitlah onicnic inchiuas tla amo inmitzonixyehyecoltis achtóh, para ohcon tlen neh inmitzontlatlautia amo ixconchiua nic neh inmitzoniluia, tlamo yeh maualeua itich moyolo.

<sup>15</sup>Inyoluia xa Onésimo omihcuanih monauac non quesqui tonal, para satepan mouan mai ica in sintitl nochipa.

<sup>16</sup>Acmo quemeh se moesclavo, tlamo yeh itlah ocachi cuali uan amo se esclavo, yehyeh quemeh se mocniu tlasohtli. Neh intlasohtla tlailiuis, uan touatzin tlamilauca ocachi itcontlasohtlas, amo san quemeh se talticpactlacatl, tlamo quemeh se mocnitzin inauactzinco in toTecotzin.

<sup>17</sup>Ica non, tla itnechonmati quemeh ittiqitcaicnimeh, inmitzontlatlautia ixconsili quemeh oisquia yen neh.

<sup>18</sup>Uan tlanah itlah amo cuali omitzonchiuilih, noso itlah mitzonuiquilia, ixnechonmemelti neh.

<sup>19</sup>Neh in Pablo inquihcuiloua ica neh noma: Neh inmitzontlaxtlauilis. Masqui tla onniquisquia uilis inmitzonilnamictis touatzin itnechonuiquilia moyolilis.

<sup>20</sup>Inmitzontlatlautia, nocnitzin, uan in moyolchicaua nic itpouih iuan in toTecotzin, itconchiuas tlen inmitzontlatlautia: ixnechon-yolohsehseui inauactzinco Cristo.

<sup>21</sup>Inmitzontlahcuiluilia uan in moyolchicaua nic tontlatlacamatis, uan inmati nic itconchiuas ocachi uan amo tlen neh inmitzoniluia.

<sup>22</sup>Noiuqui ixnechonpialihto canih nahsis, pues inchia Yehuatzin manamechontlaocoli in paquilis nannechonpiasqueh ocsipa namouantzín nic namonmotlatlautihto-queh inauactzinco nopampa.

### Pablo monauatia inauac in Filemón

<sup>23</sup>Mitzontlahpaloua Epafras, naquin nouan tzacutoc nic ittlanonotzah de Cristo Jesús.

<sup>24</sup>Noiuqui mitzontlahpalouah in Marcos, Aristarco, Demas uan Lucas, yehuan uan neh sansican itsepantiquitih ittematiltiah in tlahtol tlen cualica temaquixtilistli.

<sup>25</sup>Nitetasohitalitzin in toTecotzin Jesucristo mai namouantzín. [Amén.]

<sup>a</sup> Onésimo ictosniqui “cuali tiqitini”.